

太

函

集

太函集卷之五十五

新都汪道昆伯玉著

墓志銘七首

誥贈奉直大夫戶部員外郎程公暨贈宜人閔氏合葬墓志銘

大江以南新都以文物著其俗不儒則賈相代若踐
更要之良賈何負閔儒則其躬行彰彰矣臨河程次
公昇槐塘程次公俛與先司馬並以鹽筴賈浙東西
命諸子姓悉歸儒不佞道昆附臨河仲子金丙午同
籍明年從槐塘伯子嗣功釋褐後六年癸丑仲子始

對公車授南水部郎母閔見倍其後謫安吉倅長沙
貳河間且入尚書省適次公以大耄終 穆考即位
得贈父奉直大夫戶部員外郎母宜人皆不逮矣伯
子始以駕部封父母卒加贈南少司徒先司馬暨先
淑人受封者十年幸被 卹典人言三家若屈昭景
鼎足而居三君子以賈代興則奉直公爲賈人祭酒
三長者子以儒代起則仲子鱣然以貞白鳴其後最
漢陽格不得加贈遂請老則以倍親而仕思博再命
以顯吾親顯之不遑仕于何有歸而將奉大事爲馬
鬣封惟伯玉志之銘之庶幾猶及顯于地下道昆唯

唯越丁亥冬十二月癸酉仲子帥諸孫曾孫玄孫某
某奉奉直公及宜人喪合葬舍南之潁源負丑抱未
仲以諾責來討慎無忘平生之言道昆深念曰奉直
公家食之概則間史書之其爲節俠則掌故卒史書
之及其歸老以壽終則惇史書之甚具宜人之自女
而婦婦而母也女史書之不佞道昆無用志矣間史
之言曰諸程率祖晉太守公宗梁開府而槐塘臨河
特聞開府血食郡中臨河故有沚嘗之祀公始倡衆
建祠事入祠田於是祀有常所有常經矣公大父士
華父廷實世受賈而公幼以偶句驚塾師父携之吳

輒能代父兄任賈事父無祿即世骨立盡哀念寡母
朱居庭壹以不逮事父者併逮事母外弟方氏子母
黨也孤而貧公廩之終身殯而葬之近地凡此皆孝
之屬也卒史之言曰公字啟明質直好古吳越人稱
古愚先生而不名公其託於賈游乎顧持大體筴事
若觀火不操利權部使者行部中必任之以紀綱之
役即諸豪賈善握筭必就公受成諸賈僦雲間方市
斥地取近竈便利議築室護東公灑然曰必欲東卒
有警將不免乃白縣令無如築護西完令從之其後
三十年寇無入護西者居人始多公筴金山衛卒溺

死死立募善泗者出之諸市駟沒母錢度其不支去
勿問凡此皆智士仁人之屬也惇史之言曰公遣二
子受易東吳伯狂而仲狷也公律以中道右輔相而
左財成及仲起家且得郎署尋抗當路從量移公聞
而喜愠不入於心色由由自若居常以莊憚諸子弟
多繩墨之言始而沮既而慙終焉顧化公故席饒益
務敦朴爲閭里先比仲入官減家人產每上食即甘
毳不具必命諸孫前爾曹第肆雅歌逌爲吾壽酒酣
耳熱歌鳴鳴和之庶無疾病以終天年蓋春秋八十
有三乙丑六月望也即公不必富其斯壽考康寧考

終命之屬也與哉女史之言曰宜人嚴鎮之自出在
室事後母比有家事盲姑並以孝聞公馬首東則宜
人持家秉劑羸縮必中度稽出入必中程伯子鈺以
童子籍諸生意揚揚自負宜人慮其泛駕操之嚴仲
丁年陸沉其黨諷之學賈曰其利速無寧以于思而
希儻來宜人謝曰樹木者莠非旦夕效也食而教之
益力仲貴而後其喜可知時就養留都則繫二少子
還歛既歸二少子鏗鏞遁死宜人哀甚丁巳三月晦
以春秋七十一終要以婦順母儀則孝慈恭儉之屬
也乃今信而有徵者宜莫如郡史不亦取取乎哉不

佞道昆無用志矣銘曰郡中顯者若而人苦節無如
仲子受 譽命者若而人義方無如仲子之所自始
其曰奉直庶幾乎有道如矢其曰古愚愚不可及者
以此其曰宜人固宜爾君子宜爾君子之子魁父一
丘有橋有梓在豐之干在潁之汴偕老于斯亦既樂
只墓大夫職之以告祝史

明故浙江都司經歷章岐汪季公墓志銘

王祖起歛東略其後避地宛陵之南唐末復徙歛西
祖思立公爲別祖區分十六族遷東南者曰章岐處
士郁封文林郎孺人胡其室也席故饒業大起息子

三長鏢獨當戶仲鏜季鐸並入成均仲歷奉訓大夫
雲南提舉季故以偶材著所至輒傾其曹始爲函丈
諸生大司成獨多季即數不偶率以美言寬之士固
有經藝如汝文而終阨者乎母怏怏卒受山西布政
司經歷以單車行監大夫部使者環視百執事無如
一從事良比歲虜酋款關率倚辦從事例貨歲緡以
給馬市費贏二十萬緡先是或愆期或雜苦從事母
闌出入轉轂以時所部舉吏材遞上從事狀進浙江
都司經歷勤事如初于時間伍甫寧諸連帥凜凜從
事務申要束布威稜杖馬箠入諸軍莫不警服所部

以爲敏將舉吏材疏且行從事輿疾而去戎幕所部
堅不予告終不失一良有司比聞首丘則閔焉恤之
矣其疾起于邊市奔命忘勞使將事者皆若而人事
無不集顧茲以死勤事如此勞人何昔在嘉靖辛卯
季公生迄五十有六年爲萬曆丙戌僅下壽耳往余
貳邦政遇次公京師居然才矣余既得請過長公里
中法程自治家殆難爲第其後與季公一再見是難
爲兄三人者皆亢吾宗而季公方嚮用竊惟一命之
士寧詎無才已拙則樵已巧則黠樵者不達黠者不
馴上之人不慢則疑視之直腹背毛耳善仕不如遇

合固非虛言季公在橋門則閩海林公以大司成至
當在晉得當西蜀高公河南辛公在越得當關西溫
公此皆章相之珍社稷之衛也余始釋褐蓋與林公
俱其後問俗問邊而三公者皆余所雅轂季于是乎
得主矣不亦遇合乎哉天假之年其遇未艾惜也季
公受磻溪方氏室繼潘氏納蔣姬舉子一人是爲太
學生守詔納婦亦磻溪母黨舉孫四人女適博士第
子程近光孫女一守詔卜吉秋杪奉季公喪藁葬某
山之陽屬余志而銘之將以示後世志得其概矣乃
爲之銘銘曰士不必崇階而具而材材不必駭衆而

適而用季公以貲起家而其材足賴晉事方伯越事連帥通市日中宣威閩外文武並驅周旋不倍云胡盡瘁天不憖遺簡在行部寔命不齊新阡若斧密邇金雞夜臺無晨君子攸棲

明故宛平丞吳長公元配汪孺人合葬墓志銘
夫孝子慈孫務溢美以侘先世作者藉其口實謬以爲傳信足徵覈者不讐率以諛墓見坐諛墓無當君子恥焉不佞以善病廢修辭庶幾爲寡過地在昔吳處士榮讓即世則嘗志其墓而銘之其人以長者特聞非諛也處士有長者子二伯氏由胄子授宛平丞

處士稚少文伯生而恂恂類儒者則授之易命爲儒
處士故食貧伯夙夜治博士業祁寒無所得火即憑
手足不少休大父客死襄陽有待丘首伯年十六輟
徒跣從父走數千里歸大父喪人言處士能子哉伯
亦聞孫也歸補文學弟子奉處士命入成均于時馬
祭酒汝驥李司業舜臣並以文行師天下士諸士受
業函丈兩先生獨交譽身之良身之伯字也嘉靖中
得丞京邑 縣官方急徵發宛平以首邑當其衝丞
故賤有司即強項將必折伯任職特以醇謹辨應之
上遣中使設糜粥鋪餓人中使倚辦丞令百出丞中

夜往夙具以時至則人人屬饜菜色皆起窮民以逋
負繫園土無慮數十百人丞出橐中三百緡代之輸
乃釋邑故設二丞分治糧馬馬丞負盛氣侵糧丞官
伯陽爲不與也者而退讓之奉職惟謹頃之馬丞慙
自服卒相結爲驩部使者按京師逋檄吳丞循理狀
居三載例當遷伯竊歎曰正已一豎儒直奉父命挂
一職輦轂下今幸履滿無大過庶無傷考氏心與
吾日執手板踈踈牛馬走後塵吾寧歸養吾親所不
足者非五斗也既歸子舍仲氏亦得謝還伯就仲言
大人耄矣疇昔之仕君猶父今茲之養父猶君大人

以胼胝起家以緩急誦義吾儕第奉家法重積厚施
家有嚴君是亦爲政處士居常嗃嗃晨夕務承其驪
內計畱畬外籌鹽筴身衣大布與諸力作者俱至其
急周親聯近屬求師予雉逆婦予禽除道梁津嚮風
首應蓋先後一轍矣處士著家訓日討諸子姓而申
之曰家丈人有言勤而不儉則漏卮也儉而不勤則
石田也小子識之人言伯象處士賢胡爲乎不嗣伯
謝曰嗟乎仲之身則吾身仲之子則吾子仲三索而
得勉學之子也才吾子之足矣乃命立勉學爲後畜
之家勉學始勝衣輒奉諱三年喪畢通籍橋門斌斌

然質有其文伯于是乎有子矣初伯受室稠墅孺人故以女德聞吾宗比有家王姑程姑陳具在孺人兩將事惟謹各當慈顏歲寒姑病肺思鮮藕藕非土產將安求鮮舍旁故樹芰小池荒久矣蒼頭徧索泥中無所得孺人昔夢神人指方向藕在東南隅詰旦得鮮而薦之姑病已孺人不宜子遞進諸姬陳姬舉女子一人視猶已出笄字吾宗汪九鼎伯終身厚給之伯考終則以萬曆戊寅八月朔其生也爲正德庚午二月幾望不及老者一年孺人少伯者一年生辛未十月六日先伯卒者二十二年爲丁巳正月二十有

八日享年四十有七伯多孺人婦順備矣哭之哀卜
兆洪梁之東山以待同穴歲戊子春二月吉勉學始
奉父母喪合葬如成言其繼室張側室陳不得祔勉
學善吾兒無擇紹介吾弟會而乞吾言昔者吾父微
惠明公王父賴以不朽不肖孤安敢望父黨辱在通
家茲從斧封願明公爲吾父母地余三辭而始一諾
姑舍吾禁而爲之志爲之銘銘曰老氏之愚德充貌
詘孔氏之愚古之遺直易不雜于湯無加襲是曰古
愚愚不可及倬彼東山其封奕奕借老九原厥有良
匹時春時秋時愴時惕主鬯斯男世祀無斁

明處士充山汪長公配孫孺人合葬墓志銘

休之東略曰充山距歙五里而近汪長公系出越國是爲吾宗草市夾岸而居孫氏最著二姓秦晉匹也世爲婚姻長公名海字德宗王父暘父曰實母則程也生而魁梧伉直父黨率目偉之孺人父曰玄母程則由溪之自出父母擇可而字歸長公長公從父買房村席故資以麴蘖計什九居外則以家乘授孺人仰事王舅姑及舅姑子舍悉辦高堂具在日討子婦而訓之與其以詘爲羸無寧以羸爲詘長公雖服上賈黻衣食出無輿孺人不袪不珎泊如也長公即務

重積顧獨以廉賈聞嘗渡京口客遺金橐舟中長公
留無行待亡金者至驗之合舉金橐歸之問姓名不
告而去以故數以天幸丁年而痘無傷嘗醉墮馬嘔
血數升健食如故會呂梁浸決遣使者出治河長公
笑曰昔決宜房即漢武且不治是役也惡能與水爭
功浸假而決呂梁房村瀦矣雖吾三世居此寧遽能
釋利權儻然猶豫重遷直將爲河伯釀耳仲氏曰善
於是改業而南以質劑息子錢一居雲間一居東省
業愈益起而房村竟爲河人多長公策如陶朱公去
就審矣孺人遞多娠育者子二人女一人申以劬勞

痛且革執兒女手曰天予吾息不予吾年而三人在
則母在母已矣而曹勉之藉令歸母令名母且不朽
卒年三十有四歲在龍蛇諸子女喪之如不欲生藁
葬以待同穴長公授二子職各以其材命體仁承家
其世吾業爲主器體義治經術其從叔父入太學庶
幾異日者大吾門二子夙夜競競各修其職中外謂
長公有子乃始稅駕兗山里族有違言必長公居間
而解兗山瀕漸江而里水溢卒病涉甚者且害田廬
長公築堤捍之脩若干丈廣若干丈甃石梁以濟涉
者里中人人得長公同姓舍于其隣聚族求售其一

人以不逞見憚避莫與交長公嘆曰何哉夫夫一夫耳怵一夫而圯其族我則非夫乃召售者俱來叩之狀宣言曰是地也於吾則附贅於爾則故巢一旦而覆爾巢孰爲歸所乃今其屋可購其地可廬吾舉千金之賈全歸而曹悉如吾部署其餘則以爲資斧庶其有瘳卒如其言不逞者德長公尤甚會有 詔治經界曾令君擇殷厚馴謹者一人爲黨正長公與焉比履畝張弓者弓握筭者筭典書者書長公第心計之不失尺寸或訟疆事令君輒以兩造屬長公片言各當其心乃報命及畢事令君表其間最長公勞長

公故以共德起家中年客奉滋溢客至必盛供具數
見必鮮既艾日從諸俠少遊近聲伎博奕終日無倦
少年迭出終謝不支年始及耆復出而遊吳越日置
高會召諸故人爲平原驪踰月而歸則以歲杪值初
度諸子姓從諸周親近屬逋爲壽燕飲視吳越有加
獻歲益勞疾幾殆諸子姓惴惴無能以身代之長公
戒曰吾故有大患二而吾自如今則大期至矣天其
息我以南面王樂不息何爲季春吉月乃終年六十
有一繼室以葉息女二人其婚媾則冢婦吳繼吳介
婦黃長女歸孫太學明元是爲程康功舅次歸程子

玉季歸孫惟烈長孫拱北字于曹爲儀制郎女次用
光次用咸皆字于孫孫女五人並字名家子是月癸
酉二子奉長公喪舉孺人喪合葬兗山之陽乃復紹
介程康功待命墓門之石竊惟長公三世之業迄是
用成于時爲秋秋有實矣長公墮戶而蟄瑟瑟然務
深藏於時爲冬冬府萬物者也及其授孟以賈授季以
儒家政有維生生不息于時春也嘉生以之季年乘
獨力爲堤梁捐重資治宮室遊道日廣行樂無饜斯
其處之時乎浸光大矣孺人陰德也爲歛爲藏乃若
疏達高明不干其身于其子一闔一闢歲乃告成相

與歸亡何有之鄉矣不佞業已爲長公壽窀穸之役
何辭其事則取諸從弟孝廉之狀程仲子洵之傳爲
志爲銘爲可傳也銘曰謂公也樵其智則穎其行則
危謂母也札其息競爽其祥濬發嬰之齒不必童而
德童享不必童而業童充山隆隆爲馬鬣封携手相
從斯其伉儷之幽宮

明故處士李仲夏墓志銘

泰茅氏曰自道術裂而爲三儒者絀佛氏滋甚夫儒
服先王之教日操功令以徇齊民然而嚮者什三倍
者什七西域去中國踔遠言語詮俗不通東渡以來

靡然顧化其間長者子出率以信心直心深心而得
菩提心要之負俗歸宗華戎一統儒者以夏損夏惡
在其不相謀邪 高皇帝都金陵六朝之遺風具在
其以居士身奉教者莫如李仲良李氏系出黃巖豪
者曰李轉避明氏亂蹈海而漁洪武中 詔民間習
水者徙京師則以轉隸水軍右衛其後通生榮榮生
銳銳受室林氏舉丈夫子二人長曰賢即仲良次曰
質始仲良在外傳故以敏給學爲儒及公役煩興父
大困仲良乃釋業而賈爲俯仰資居常不競刀錐顧
工握筭雅以然諾取重片言可質千金且善居間談

笑而兩家之難解轉轂所至樂與諸豪長游居息日
羸齒於上賈競競然懼爲怨府務折節下人市猾以
家人產質母錢久之踞產倍約仲良笑曰是皆儻然
而去者也聽之薑者將不利仲良伺而未發則又曰
吾得梁鴛術矣適其適乃鑿薑者內慙駢首去尾仲
良事父母孝齋用無所儉於親母右仲而視耽耽謂
其治生不若伯伯所奉者或私予仲睨者以爲言仲
良斥曰母一兄一弟一寧詎誰何母私猶予私弟獲
猶予獲也母弟聞而心服卒無間言及居父母喪毀
瘠幾滅獨力以襄大事仲無及焉丁年不宜子既踰

四十遞舉子五人乃取篋中券焚之置千金勿問五子嶽立授事各以其材長應春次應時皆籍胄子次應芳受賈次應和次應元籍京兆諸生比議婚姻則長婦納楊次納焦繼吳繼王舉孫志英次納劉舉孫志嘉次納湯次納張息女適管齊朝皆世家也仲良自言故以窶人子起賈豎中不得比一逢掖幸而喪塋婚嫁畢矣寧能搢搢然爲拏虜哉開士喜公得南宗東游建業仲良一見執弟子禮就舍旁建精舍居之師曰吾示汝直指正宗第於彈指間可超無學仲良大悟遂專事西方既從通公受淨土文日茹清齋

持佛號時或揜關趺坐以爲常歲侵都民有殍窮冬
率就瓦官寺開講百日日飯餓者數百人季年益樂
檀施梁津除道不勑於勤江少卿治攝太常予同籍
之有道者也嘗以祠事登玉皇閣百廢一新詰孰爲
之黃冠對曰李長者公以爲善特書棹楔獎之上
十年 詔賜高年爵一級李京兆丞已重許可不輕
以名器假人謀諸父老且下諸生皆曰無如李長者
仲良始拜章服一再御而笥之比年望道益專求道
益力語涉生歎輒嘆蹙與諸眷屬言人之生妻子未
足爲累惟將歿爲妻子累耳如我死慎毋以號咷櫻

我冥行我得死所矣丁亥四月偶病痰戒諸子曰大期至矣毋以藥石苦而翁秋九月繼室阮孺人捐柩捲公不哀猶力疾綱紀喪事戊子春二月申誓諸眷屬如嚮者言乃盥沐披衣端坐五晝夜頭容不側鼻息不聞至十有一日寅時乃逝距生正德壬申冬十二月三日不及大耄者三年都城內外聞之率手額曰李長者西歸矣余諸弟子客長干者故多仲長當戶子應春謂予羽翼三教不憚溽暑徒跣而走函中則奉尚書郎沈君爲狀千言屬予勒墓門之石予故有箴于闕佛者如之何楚越肝膽哉若仲良其人亦

吾徒也仲良得兆其山之麓吾爲之銘銘曰則而躬
行而孝友矣則而治生而創守矣則而焚券吐而羸
矣則而守雌去而牡矣四美既具節俠彰矣即不爲
儒醇儒耦矣反面西嚮得故吾矣業白而居純而守
矣善哉乎濺濺者泉依依者柳長者之居其宮半畝
倏然去之舉非吾有今而後庸詎知泉之及雷也邪
庸詎知柳之生肘也邪

明故中順大夫思南府知府洪公配恭人王氏
合葬墓志銘

余少從洪季子廷諮同受方博士禮洪恭靖公故與

方濟南公同籍並以三禮起家季子受室方醴陵是
爲濟南公子季子則恭靖公孫思南公子也思南公
既解郡而家食余介季子謁公公疑如泰山屹如鍾
鼎亭亭然如苴梁水眈眈然如省括而引中黃余故
不馴肅然以莊見憚越三年丁巳六月九日公以天
年終及余予告歸寧季子見客自言無祿先公即世
越三十年迄今猶藁葬宿草中以待吉兆遞卜遞僭
茲始得一丘司馬雅以傳信有聞願賜琬墓門之石
會違言起墓大夫聽之彼辟此秉獄既具季子則以
夫夫亦吾先大父世講之裔寧置不爭越十五年爲

今已丑得兆南山之麓負坎抱離乃伐石而封墓門
請如疇昔余惟鄉先正列卿之後恭靖以阜昌特聞
思南公歷四十五稔而始封蓋其慎也余按公所爲
王恭人狀宗大夫汪得之所爲公狀合而爲志爲銘
其所未詳則季子誦說之矣志曰思南公价字承藩
南京工部尚書恭靖公任子也恭靖父鄭州公寬大
父處士公壽並以恭靖貴追贈資政大夫南京都察
院右都御史諸專門執禮者則鄭州先登鄭州逆婦
里中蓋吾宗之自出是爲恭靖母贈夫人先是莘墟
右司馬吳公過洪源恭靖以童子見目偉恭靖歸語

其子狀安得若而子也者而妻之子持然疑當決諸卜公咄咄寧寢人謀而從鬼謀卒主盟以宗人別駕能之女歸恭靖即吳夫人也息子四癸卯二月二日思南生先是壬寅閏八月二十七日澤富王長者權舉女生而端靖諸富室爭問名恭靖終鄭州喪卜思南耦長者敬諾其斯爲仁人後乎思南幼受業成均師牛太守書聲琅琅徹函丈大司成召而禮之如成人尋居母喪執喪禮唯謹踊而傷足匿不以聞期而從恭靖南臺力學如故恭靖弗覺也鄧比部善恭靖數目思南曰疾邪胡爲乎負疾而學不輟引歸庭內

屬其室善視之足既瘳恭靖帥思南稱謝比部曰嘻
此公家鎮公子也何謝焉思南既昏季公佖亦納婦
恭靖歸省封樹三婦謁於庭既退恭靖語程夫人三
婦無如仲婦良其福澤源源矣思南故學禮於二千
石史氏尚書郎張氏莫氏督學使者陳公琳行縣籍
諸生四舉內史部中弗錄諸及門之士率以高等賓
興孝廉程默程然其雋也恭靖敷歷四方冢婦介婦
攝家秉恭人以身下冢婦而獨任其勞及夫人興疾
歸恭靖屬諸子舍居三日趣入秦恭人宵衣而事夫
人以孝謹著比當大事率以禮佐思南越七年恭靖

終南司空第思南匍匐而北請 卹恭人逆櫬且卜
葬期次子廷謹始孩痘未發里婦言痘不宜厭調送
葬何恭人謝曰爲人子婦不逮飯含瞿然如有所失
乃今臨穴不赴謂終天之憾何卒送葬如期痘亦無
恙思南以任子再試乃再竒遂謁天官受南京左軍
都督府都事太宰朱公劉公多公侃侃檄之再攝前
軍再攝通政司諸勳府欽祗下公公事事無敢慢母
訟子不孝待命納言公廉之則母繼也公叱其子繼
母如母咸在不原顧謂其母曰即孺子無良亦而夫
遺體也則皆感悟遂爲母子如初于時恭人從之官

愈益佐公請白拓舍旁隙地日課童僕治畦蔬幕府
上程書受勅階文林郎王封孺人矣尋進本府經
歷以皇太子覃恩階奉直大夫王封宜人並受
誥命尋拜二千石守思南故守或以爲晏荒而鄙之
什五不往公太息曰莫非王土命之守土將安辭
會息女新寡而恭人留則單車往郡故雜夷喜聞至
則惟化俗爲孳孳廣勵學官務興文教諸生田時龍
陳嘉兆皆舉高等郡中始與計偕名宦鄉賢始有祠
郡始有志貴州始專鄉試公始爲受卷官以文告諭
諸夷以禮法遇諸酋長由是諸夷應召如響諸酋長

皆用命無愆期苗民故禦商公置峒長守要害盜乃
息播州凱里仇殺相持累年屬公驗問宣言禍福諭
之遂解商有誤附盜舟併獲者公白之觀察卒以不
寃印江縣請硃砂塲公不可是將驅吾民舍耰鋤而
競椎鑿且生厲階議遂寢會大工採木倚辦黔中者
半蜀中公爲之擘畫調停民不擾而事濟會有安南
之役檄思南簡閱龍里平越清平三衛精銳以待徵
且督軍興給餽餉適聞王恭人病甚公致爲郡而歸
比至家大工上賞且下家居嗃嗃不取苟容長子
廷誨婦爲唐御史女次即廷謹婦爲吳太學女次廷

諾婦爲羅處士女季即廷諮方醴陵壻也晨起坐庭
內諸婦結佩而朝脫後期公色不懌每上食則諸子
左右侍畢至而公始餐脫一不至公嚴色坐待之或
以有故白公公始降慈色居常省恭靖墓爲之踟躕
忌日哀如初喪奉祭事必恭人脩薦如禮歲辛丑恭
人先公而耆中外遞上觴恭人色喜自言嬰疾久矣
不自意猶及於斯且吾舉子故遲遲不自意得見諸
孫若而人矣皆天幸也癸卯二月十九日恭人乃捐
栢棧又明年公夢入大宅間無人則自以爲異徵也
尋亦即世不及偕老者八年耳公言恭人善心計歷

久不忘門外諸子姓受成則言言中度即務纖儉而
施予徧及五宗父母季年少子當室卒之孝養無缺
則恭人代之宗大夫言公既稅車車轍不入城市獨
聞驛書至皇皇然亟欲觀寓內庶幾無虞于草莽臣
足矣其效忠則天性也乃今襄事惟季子任之爲孫
者十有四人曾孫二十有四人玄孫七人其婚媾皆
閭右要皆恭人出也恭人福澤卑厚恭靖之言有徵
哉銘曰世祿之家鮮克由禮公不其然唯禮是以恭
儉莊敬承家有方柔嘉維則刑家有常變夷用夏以
禮爲邦延于奕世以禮阜昌萬石躬行里門內史相

敬如賓下軍夫子南山之陽厥土駢剛伉儷歸藏若
斧若坊於乎其斯爲不死之鄉

明故曾祖妣方太孺人曾叔祖妣吳太孺人合
葬墓志銘

我曾祖暨曾叔祖是曰塤篴二公二公皆受室於吳
皆澄塘之自出先曾祖妣無息蚤世曾祖塋之墓塘
繼吳以方出巖鎮是爲我曾祖妣少曾祖十歲生正
統庚申七月十七日辰時舉世大父玄齡我大父諱
玄儀大叔父玄俊玄傑玄仲享年八十有四終嘉靖
癸未三月朔日亥時先是曾祖以天年終蓋並登大

耄而過之矣曾叔祖妣少曾祖妣十歲生景泰庚午
正月四日子時舉大叔父二人玄侔玄偉享年厯五
十九終正德戊辰八月望日申時二柩並厝潛林迄
子若孫不及葬無亦從長則寔尾從衆則跋胡蓋其
慎也顧歷世滋久無慮七八十年迨我曾孫更復何
待歲丁亥道昆始帥五宗奉曾祖喪塋岑嶺之右曾
祖妣不果從彭令君雅言方外劉真人受僊訣旁綜
形家而獨擅場直翩翩爲采真遊不可致歲杪真人
適至客太函戊子春三月奉真人入里中舉宗以吉
壤請真人言疇昔問道先司馬目攝舍後山有佳氣

吉壤在焉迄今餘二十年故物具在是足以奉壘裡
毋他求相從而登真人歷指方嚮山龍跼靈金山爲
少祖逾而上歷小靈山降大聖山折而西南峽潛口
起竹麻突蜿蜒右行峽東山爲鶴膝又峽汪塢爲金
牛轉車循壘而之東南折而入酉其兆負酉抱卯辛
乙參焉頂平如蓋當穴分辨如夫容左右夾輔如卷
阿下如釜背如盎面立一峰遙拱如執珪有衆驚服
而羅拜曰自先世卜居四百年兆屬于垣而不察吾
黨時而游衍時而登臨枕於斯籍於斯脩無筭爵於
斯放浪乎亡何有之鄉乃今始得一抔土不啻操蛇

之神立寘大行王屋真人不問嚮方不諏歲月第按
十二時取真太陽化凶爲吉臨穴則握靈符咄咄用
事直將騎日月而鞭雷霆道昆夙知之矣于時踟躕
四顧立表中央乃命受工先規後矩既用畚其土駢
剛惟徑尺自酉來作黃金色坎四尺皆純土土物皆
同既則五色石糝之遇鋪立解非石也頃之青龍見
左壁次則白虎居右皆前行而左右交及深可拚輪
四隅石益堅紉當酉一坎委蛇若瓜蔓貫中而歸左
引手可拈薌如丹砂細如膩是曰真土真土乃見可
封越三日辛卯曾玄來庶數十百曹相與奉二曾祖

妣之柩合塋焉旬日襄事竊惟吾汪著千秋里世受
力田七穆中興本之聖善其後爲孫者二十有一爲
曾孫者五十有二爲玄孫者九十有四來孫三十有
二庶孫三諸子贈兵部右侍郎者一人諸子婦贈淑
人者一人諸孫封兵部右侍郎者一人諸孫婦封淑
人者一人曾孫任兵部左侍郎者一人授京衛叅軍
者一人授新安衛指揮同知者一人任子一人太學
生三人郡縣諸生五人曾孫婦贈淑人封淑人者各
一人諸玄孫授金吾衛千戶者一人太學生三人郡
諸生一人庶幾僅有聞矣乃今而得吉壤幸哉

六函集卷之五十五

太函集卷之五十六

新都汪道昆伯玉著

墓志銘六首

明故武毅將軍飛騎尉焦公墓志銘

大司徒耿公故持功令從首善得焦弱侯是爲太史
竑蓋天下士也歲甲子弱侯與計偕甲申奉父武毅
將軍諱越丙戌秋八月弱侯乃禫適不佞客京口三
山則自金陵就見將奉大事持蕭太史所爲狀屬不
佞爲志爲銘不佞歸臥函中不遑文事己丑弱侯舉
公車第一人諸同升者遞入新都遞以成言來討惟

茲不朽之事太史職之弱侯都著作之廷惡用不佞
爲也第負諾責其何敢辭焦氏自瑯琊徙金陵自別
祖源始 高皇帝兵起源從常忠武歸之累軍功封
昭信校尉源子以先登最 帝賜名庸進封武略將
軍秩副千戶庸故子武襲武故子昱襲昱受室方氏
舉武毅公文傑字世英公生三年喪考妣孤立當戶
不失丞嘗比出幼當襲官資斧不具大司寇周公具
知人鑒心壯之授資以行乃始得襲居常伉直持重
守軍政者四十年歲庚申振武營兵變乘風擣賞從
者如流公勒所部士按劍誓之曰 國恩參爾曹二

百年一旦而萌逆節 高廟在柰何于雷霆所不用
命而恣睢吾有是三尺耳一軍皆戢聞者帖然故事
衛士以部卒戍鐘鼓樓保章以其徒屬主漏刻籍名
而已亡復誰何公當戍則以 九鼎重地聲教繫焉
藉令坐視陵夷其何以聳觀聽輒移文將作葺而一
新部卒失伍則以軍法行罰保章徒屬概毋貸公舉
伯子瑞授之經業既成弱侯且入塾公語當室之教
父爲政介弟之教兄爲政故人樂有賢父兄瑞日與
弱侯俱奉教廩廩瑞受靈山令祿入不及於家間者
謂祿仕無他爲養與祭長君若此于祿何爲謝曰吾

幸得糊口太倉家食給矣今之仕者祿入不足以養廉公爾忘私夫夫是也吾雖老詩寧詎能以非易是哉通州吳簿部運南儲囊八百金寓公所簿暴卒家人不及知公出遺金且護其喪歸葬公年及指使謝戎行伯子先亡仲子靖襲公職叔即弱侯也季曰螳公再奉 恩詔以齒進階遂加授武毅將軍飛騎尉季年棄人間事味方外言延諸比丘嚮往西極廬山僧大安見客虛精舍爲百日期大安故入宗門得天童家法公因有悟寤寐現大光明預定日時令掌舉佛號而逝時年八十有二其化人之徒與弱侯又言

考少孤先妣徐主中饋世母獨而卜日薦滫瀡餐之
考妣相與食貧飯脫粟而已外姑劉寡藐一孤嫠而
愚養生送死率倚辦之不遺餘力公既授二子業日
討古昔而訓之儒有席上之珍翁之韞玉務守純白
卒以無瑕浸假而瑕純白缺矣此其法言景行庶幾
乎質有其文人言公由高曾祖考迄于其身相承五
世由弘正嘉隆迄于萬曆更事五朝位卑名高祿薄
資厚卒踰大耋兩及 覃恩于公足矣假之五稔幸
得于其身親見之天不憖遺惜也嗟乎萬古一瞬公
已前知由不可思以至不可說明若觀火惡論旦暮

乎哉大安終廬山不佞嘗銘其塔是役也幸得而應
弱侯則同聲也銘曰委吏乘田聖人不鄙厥有司存
稱而已矣鍾鼓在縣公必更始得時于城惟其所以
禁旅脫巾羣囂競起五等六曹望風而靡按劍奮呼
疇敢干紀藐彼絳侯跋胡疇尾從游赤松託跡吊詭
晚學無生孰發而排天童作師萬法一指奄然西歸
其誰之子爲荷也者而不淤爲蛻也者而不滓賈豎
之原化城言言帝懸既解 帝命來宣其將以是爲
極樂其將以是爲祁連

胡少卿墓志銘

胡子仁以御史按廣西就部中補四川按察司僉事
居二年所徙陝西苑馬寺少卿未及行以勤事死尊
君命故稱少卿胡氏系出少微世居海陽東略曰百
石父正禎贈御史嫡母程贈孺人生母毛封太孺人
毛夢乘與幸舍中少卿乃降則丁亥夏四月二十有
七日也父咕咕喜以爲貴徵幼學書記家塾中塾師
以爲敏既冠受博士易傾其曹聞東陽盧氏以易名
家盡得其學歸試輒據高等以經術先鳴縣大夫羣
博士諸生推轂少卿爲之長聚徒講業闔弟子室無
所容其教黜口耳而牖心知務使其自得諸孝廉茂

異悉出其門 先帝元年與計偕越五年舉進士出
爲蒲令即長垣則以先賢用三善得民民猶古也乃
今列在畿內而文教不興責在令孳孳吏治必緣文
學飾之入境輒新學宮與士民更始既平獄訟省租
庸日課生徒程經藝以其餘力繕城垣葺部署脩祠
宇甃交衢所部獨多蒲爲三輔冠語載監大夫部使
者六疏及石太僕碑中既就徵得南京福建道監察
御史時江陵專國御史傅應禎以言事編戎行特上
封事請釋之無所避有頃奔生母喪居廬膳諸門人
講習故業亟謁先師廟徘徊宮墻乃太息曰嗟乎此

故吾脩業地也吾力能新之邑獨不能新之鄉乃率
諸鄉大夫若諸父老戮力改作立尊經閣廬中出藏
書貯之其鉅麗甲江南輪奐具美服除補河南道代
狩蒼梧則又以有虞陟方聲教具在乃今臣宥在事
願爲天子設教南交遂攬轡周巡所至輒申功令
興學造士廣厲學官先是尚書殷公平古田請輸廣
東鹽利以餉戍士勅下御史無攝鹽法佐軍興乃
譏徑竇畫便宜絜爲令督府用兵八寨御史紀功功
成賜尚方金幣會新令盡廢天下書院御史獨言
粵西明道書院不當廢力請留江陵噉之尋補畢節

僉事畢節古羅施國也則以仲尼至聖猶欲居夷浸
假以忠信臨之蠻貊可行矣入境輒新學宮卜元日
告后土卜人言不利告者請遣官代之厲聲叱曰吾
方以身任一方偃武脩文在此舉也即吾躬不利利
莫大焉卒躬蒞之不旬月終事夷方書不易購諸史
尤難乃出故輯通鑑會要刊布之儒生始可與道古
時諸衛頽敗捐俸廩授材官咸與維新驛舍橋梁莫
不完繕蘭州以嫡妾構烏蒙以兄弟構聞片言而平
境內尊親不啻師保父母次當入計無所讓勞會
廷議相壽宮遣二卿主卜僉以計臣宥習圭測宜贊

二卿時 上幸山陵咸在扈從規畫稱 旨賜金幣
再酒飯七蓋異數云還蜀勤事有加病矣故以單車
入蜀與二豎子俱逋病瘡且病浚度將不起一豎引
刀自殺願代主以身一豎剖股進之以徼勿藥部中
吏士踐更侍疾日數十曹及聞報移官少卿已矣蓋
甲申八月望也疇昔始生之夢其兆非常既發憤下
帷嘔血且劇夢黃冠授調息之術疾乃瘳夜自城南
歸目擊諸送迎者夾路相接及門麾之去闔無人嘗
山居比鄰患虎聞有夜號者衆屏息亡誰何躬執炬
啟戶視之則一嫗魅水田中耳命僕掖歸賴不死嫗

既免尾嫗後猶聞虎聲嘗篝燈歸里門羣盜荷戟當
路從者震懼將奔乃自去篝秉燭自照其面進步自
若盜仆戟佯臥以過少卿嘗舟覆彭城賴居人出之
溺問之故則神人夙戒詰朝貴人有行者遇難爾曹
豫持勾繙亟救之嘗過城西屠牛垣一子牛哀鳴轂
觶屠者言毋解矣將解子牛少卿贖而豢之守塚家
且數歲及蜀計至牛輒不食投崖死之要以前知則
天人徵應章章矣顧位未及二千石齒未及耆者二
年何爽也甫即世故邑博士講堂棟撓鄉約所棹楔
崩畢節學宮震兩楹櫺星門仆即阨會非偶然已即

居常加志文學而尤惇厚人倫居父母三喪倂然骨立既當室仲始唯而季始孩伯已受經率以家秉校仲仲不任賈資斧亡乃出脩幣參分之捐美田宅以佐仲既貴逋均歲入有差始室贈孺人方繼室封孺人黃相與琴瑟終身不置妾吾安能忘屢屢伯子太學生鳴陽室邵使君女繼邵文學女仲子鳴春字金光祿女皆黃之自出少卿事適母孝庭無間言及捐柩捲外族中否歲解之勿絕大治其遺宅而居之䟽屬子玄昭負宗社毋錢迫期不能辦衆持之急閉戶將自經少卿代之償乃免里俗故慎忤違言起即聚

而操兵少卿始舉賢良輒白縣令就當路置鄉約所
歲時讀法脩睦以爲常久之無所爭瞿然顧化少卿
家食及門之士或不贍反其贄而周之及起家同學
十餘曹恃緩急如外府其徒貧乏者待之舉火即饒
給亦肱篋而授之書海陽奇陳孝廉筌長垣奇李主
爵化龍皆高第也居常自負直方不阿執政至其恂
恂退讓天性則然時居蒲會封丘令勘侯嶽獄少卿
主末減封丘將故人之觀者憤興令裂衣冠棄車馬
而去且爲蜚語將中蒲所部覆爰書是蒲議封丘以
他事敗繫而返蒲少卿卒以賓禮禮之令甚慙無死

所及按部斲雕爲園間伍晏然怙神君若慈父驟失
勢越在夷方其政寬平右教化而左文法周澤既洽
吏士民夷益親境內喪使君皇皇如失怙恃博士諸
生上治狀無慮數千言舒中丞毛直指信其有徵下
藩臬請賻予賻請傳予傳請祠予祠畢節故無名宦
祠有之自今始長垣相距三千里奔而來哭相望于
塗良亦入人者深非襲取也孤鳴陽奉柩歸葬待吉
者五年少卿故擅堪輿卜城南習吉已丑歲杪爲馬
鬣封不佞徒以一日長少卿有成言當志其墓茲不
敢廢又從而爲之銘銘曰則其居家躬處其厚肉好

無瑕則其居鄉以身化俗周折圓方則其居學徇于
國中跲然振鐸則其居官鞠躬盡瘁生順死安則其
周急視䟽如戚則其惇倫後已先人則其直節屏工
用拙則其義聲以詘爲羸荒服勞臣都人長者胡不
憇遺卒死于野生若湍露世若遽廬城南吉壤阜如
畢如是曰真宅君子之居誰其來銘司馬素車

明二千石麻城丘謙之墓志銘

余貳邦政蓋與王太僕元美同朝元美弟敬美在直
廬余弟仲淹在胷子二仲故相友善並善丘謙之謙
之弱冠舉麻城再與計偕成進士出爲富順令以課

最進度支郎部尚書陽城王公多謙之諸章奏悉出
謙之手謙之故工詞賦雅慕杜陵署中署一亭曰吾
兼則以吏隱自命出就舍日與二仲若李臨淮劉司
隸游二仲各譽謙之于伯兄楚之良也余自楚行部
入故習謙之太僕車出市中一郎引避問知其爲丘
郎也下車召之謙之謝曰齊雲謬當長者車罪無所
避太僕執手相勞誦其詩云一徑一花色無時無鳥
聲今見其人矣謙之父善江陵故相結布衣驩部尚
書才謙之數言之政府江陵驥然笑曰吾通家子也
固才會謙之母弟生雲以內難深坐謙之力求外補

將赴之部尚書固留丘郎安得出居郡江陵深念曰
夫夫手足戚也姑從之比及三年胥後命會列郡畢
補乃得潮州先是海寇據潮督府殷尚書始平寇亂
既得代目偉謙之吾即去潮且無虞今有守矣寇始
得志境內靡然向風及寇平仍趨故習揭竿則盜負
耒則農有司按罪狀追捕之未發先覺蓋左右爲之
耳目故多漏師即得神姦懼激其黨務姑息謙之至
則與境內更始壹以渤海爲程間以計縛渠魁左右
不知所出諒之命解其縛肝衡而誓之庭若魁然丈
夫吾知其必不爲盜羣小借若名以逞故坐丹書若

第質妻子郡中吾縱若往誠得有名者某子甲畢伏其辜吾爲若一洗之且受上賞渠魁惟命致某子甲如千人會按部論囚謙之業已告密則佯布渠魁功狀令詣御史臺諸囚互訐渠魁悉論棄市分部有難色毋挑釁以致蔓延謙之持之彊不者守任其咎于時羣黨辟易道不拾遺其治郡屏深文持大體下遺佚表側微延攬咨諏務振風教耆民林叟具長者行隱居著書謙之存問于家叟以草具進庭中皆牛具席無所容門前桃樹可蔽牛就之問民疾苦叟盡言直對傾耳受之自後丘里有所聞輒以書諫一鍛工

事父母孝表其間工官園蔬餽公庭笑而納之庖舍
謙之即當劇郡自比山公城中故有金山諸石林立
如筍謙之笑曰此雲根也吾棲之乃度木爲亭一寓
目而盡諸形勝則又曰山公達矣胡爲乎以池讓習
家吾亭則吾名之何讓乃大書其榜署曰齊雲亭公
暇則諸守相集亭中觴詠竟日其後按部者王苛禮
藉爲口實謫謙之彈事聞則陽城都太宰尋謁政府
寢其議即詩酒何負丘郎江陵謂潮故瘴癘鄉第量
移之內地宰公唯唯乃徙保寧時謙之父自別駕守
忠州上故相書論時政得失江陵恚甚立罷之且及

保寧皆不免時謙之未及彊仕脫躑而歸日侍庭闈
脩孝養母弟在繫逼歲除謙之歎曰蒲堂皆驩坐有
向隅之泣弟居園土吾何以奉父母歡遂躬詣士師
願與弟卒歲郡守高謙之義治具肅之謙之謝曰吾
所以來不忍吾弟獨也脫應君侯召誰其吊幽居郡
守徹席致請室中乃太息曰長公難爲弟矣弟當詣
御史對簿謙之奉太夫人護女弟舟行中流舟忽破
將沉力負太夫人登彼岸行三數里得民家煬衣既
而徒屬及襆被皆沉留三日始得去人言謙之故任
放其孝友則天性云謙之幸得休益工詞賦諸詞客

楚游者率過謙之謙之既垂索歸不問家人產食客
後先遞至無慮數十曹即暑雨祁寒阻者半留者半
客奉不給終不以寔辭家食八年忠州公始老謙之
請爲壽輕千里而乞余言乃先宿仲淹爲之紹介余
躍然喜幸從嵇紹而得嵇康明年謙之訃至春秋四
十有八耳謙之與彭令君同學其生也歲月同令君
之言曰謙之高步而軌人倫多材而退讓名高而務
折節玩世而有容其與人俱如饗太牢烝烝望人之
腹壹稟於無心耳知言哉謙之子坦有父風受室劉
司隸乃今未及樹府君墓走太函而請志請銘嗟乎

都人士所籍籍者三人敬美已矣吾弟既廢且篤且
失謙之乃今爲志爲銘固不佞事元美以尚書得謝
詎能無意乎謙之異日者胥命武林行且爲謙之傳
余先勒墓門之石右爲志左爲銘銘曰受知不必福
知者無庸推我轂遷怒不必殃怒者無庸缺我戕自
適其適失得勿恤鵬搏鵠屈奚損奚益相彼多藝爲
章爲相相彼多士爲原爲嘗天道益謙胡然顛謬爵
躐專城齒肩下壽時而物化邈矣天游吉人疇歸馬
鬣一丘

吳田義莊吳次公墓志銘

先公篤信形家言嘗豫卜朗源爲堂斧計龍左旋而
迎面玉屏卜者言得兆恒干斯蓋稍雲里吳門地也
吳門則義莊翁爲政以長者聞不佞退而深惟此難
以儻然獲也未及紹介義莊聞而心許之良珮故習
封司馬公重以少司馬之命蕞爾不毛之地其何敢
辭不佞私德義莊踰於食邑及縣官賜葬四方會
葬者無慮數千百人出入吳田則義莊爲東道主不
佞兄弟匍匐庭謝廓然若葛天氏之居故宇建自皇
唐猶有存者既善其里俗愈益多其爲人是歲不及
耆者二年奄忽即世諸孤則以考先奉王父諱寔安

之事悉出諸名家貌諸孤蚩蚩安敢望考今之作者
則少司馬在焉敢刊名言勒諸墓門之石吾宗汪文
學業已爲次公狀其言有徵海陽有吳田二分據東
南此東略也近世服賈至景芳乃大饒及次公生魁
然丈夫也里閭鄉黨相遇公不目偉次公顧無他腸
壹歸乎長厚始受積者脩故業而息之勤作深藏絕
口不言贏詘獨赴義如饑渴矜已諾如丘山兄弟怡
怡家人產迄今未割即度支過當不問誰何所親耗
母錢數百緡舉室將以爲討未發則皆屬目次公次
公曰嘻無寧競錐刀而割肺腑遂折券衆亦無爭次

公任家督田千畝材千章隸尺籍而戶不分租庸益重次公以一身辨應不煩有司令上催徵首功開府旌勞里中有構得次公居其間乃平嘗倡義葺宗祠置祀田定宗約以興孝讓雅言先世居中給事遞舉孝廉文教興矣乃今猶綫也濟美然乎哉羣子弟受經者置田若干畝爲歲糴資就馮山築精舍延諸薦紳學士禮以上賓命諸子弟師事之供具謹喪牛王母爲之治喪戴氏女金氏女既歸歲餉勿絕諸甥遞舉遞襁而乳之家及總角始遣歸或仍相依出入其嗣困乏鰥有室死有殯白骨有封除道梁津以利

行旅縣大夫式其里率存問之各表其問以勵誼俗
林令君署曰種德曰獎義丁令君署曰禮讓曰義門
且譽之曰里中有高義評語不及公門茲處士力也
郡相攝縣事則以鄉射賓義莊固謝不行乃益多其
退讓義莊恂恂者也非法言不譚病既革先期移正
寢而居召四子而聲遺言而翁從此西矣大繼當室
大純佐之大縉業已游成均治經術大紳從之四人
者左提右挈以亢而宗而翁瞑矣于是致齊旬有五
日忽合掌頂禮乃返其真豈其握善者機邪庶幾乎
無智無得矣四子咸戴之自出家婦孫出洋湖次程

出由谿叔季皆出隆中蓋母黨也孫八人狀備矣太史公言貨殖則本富爲上末富次之其下乃作奸以論已吾郡逐末者什七八而義莊則以力本承家遠近疏戚誦義無窮則所稱好行其德者矣墓在某原某向歲杪襄事余爲之銘銘曰爾貌顥昂吾得之繪事爲之表章爾質惇厚吾得之鄉評籍之間右爾墓亭亭吾得之主測銘之貞珉嗟乎不及者泉不朽者言其無負于義莊無忝於吳田

明故新安衛鎮撫黃季公配孺人汪氏合葬墓
志銘

世之爲厚利也者利用弛爲名高也者利用張弛則
重積重積則羸張則厚亾厚亾則詘此名實之辨小
大之殊也乃若用而不勤積中而不敗恢恢乎張也
夫非人傑也與哉黃彥脩及吾門故得其考氏季公
狀妣則吾宗之自出女史亦嘗紀之潛川季公大父
曰道明以積著傾邑里父曰天壽息故業而倍之歲
儲義倉饑者待之舉火娶孺人鮑納如孺人何息子
三伯子靜嫡也最景陵令父母皆受封仲子顯季子
鍾皆庶也季英氣勃勃九齡而孤兄伯仲而父事之
不敢以鴈行齒伯兄主資斧兄子與焉手割而三分

之季差薄退然曰孽何敢耦嫡孤所不足者非錙銖
季公既婚孺人故富家女其服御與里婦等無所紛
華如孺人安子舍中無諍語以身下伯仲似無違言
季公咕咕吾得婦可無內顧乃從仲兄賈娶賈台賈
甄賈括賈姑孰賈淮海賈金陵卜地利則與地遷相
時宜則與時逐善心計操利權如持衡居數十年累
鉅萬淮海多陽翟大賈日以聲色爲娛季公歎曰彼
哉靡靡乎庶幾乎達者矣乃散千金徵歌舞爲五陵
豪客言公何如鄭侯彼且令後世師吾儉公作法于
汰安足師季公笑曰吾猶見未央之爲墟赤帝子且

不保客休矣。鄰侯之裔不有臺城，仲以鹽筴居屬宗人國賓。掌計國賓坐法沒數千緡，季公歎曰：「彼儻然而來，非吾始願所及。今即去，不失故吾。」乃籍遺金分授兄子載諸姬，還歛口張具盛宴游。先是，豎子嚴資主質劑，據東甌，席卷而遁。閩海事覺，季公尾而跡之。客遮說曰：「公戒垂堂，胡爲窮追而驚千里？」季公否否。吾寧以金故自輕，豎子負重而逃，吾懼以金殺豎子耳。公長驅先發，從者十餘，曹次洛陽橋，且垂橐公佯言：「亡者今得矣。」命從者益市牛酒，飲益豪，相與枕藉而酣。夢神告亡者：「方向質明得亡者，辭連所過受金。」

者家季公置之聞者遞以壺漿餉家監請布亾者罪
狀愬有司季公歎曰金既亾即甘心亾虜猶置兔耳
鮑秋亦主質劑據金陵秋犯帷簿焚邸舍而亾其沒
不貲視資爲甚季公歎曰吾釋資而秋敗藉僇二憾
奚益哉乃並舍之即尾大勿恤會島夷大入季公杖
劍入行間督府脩幕下功授武毅將軍新安衛鎮撫
司鎮撫孺人弗善也日從容諷季公督府功高吾未
知其所稅駕君一材官耳寧能以帷幄爲菟裘季公
然其言釋附注而更初服公累世誦義鄉曲歸心乙
亥歲除帥冢子裕先廟羣盜奪門而入掠室中比隣

死士羣襲之盜當門堅自閉既而丁壯四集燎而圍之數重盜乘墉不能烏下潛下者或冠覆釜或瘞死灰旦則投械乞哀爭就縛俘而詣縣姚令君多守者功主人翁其得士乎此真將軍也歲己卯季公病且殊執手語孺人後七年乃相見公生乙酉不及耆者四年夫已氏有子而生心子不得而母孺人以公遺體子畜之亦婚吾宗孽無母而有母矣梱內之事母爲政壹如受命季公越七年孺人病顧命冢子吾自結髮起而家即偕老同歸庶無遺憾獨以資任而舅氏懼將不反爲母氏羞對曰無然此周公之過也適

子正祖即彥脩庶子正宗出夫已氏家婦吳舉孫五
士忠士良士莊士寧士圭姻氏則吳光嶽孫承誨程
汝宗程守誥程道章孫女二壻爲汪九洲吳士都曾
孫三啟虞啟襄啟宇曾孫女三已丑歲杪正祖奉二
親喪合葬靈塘抵不佞爲志爲銘從母命也銘曰舉
世齷齪公孫負俗爲朝爲穆舉世逐逐染指而足母
望而腹司隸不羣耦茲少君之子成均質有其文士
之烈也女之桀也生同臬也死同穴也土圭形之玉
几馮之墓大夫程之鄉大夫銘之

方母吳氏墓志銘

婺隱君子方元素遣伯子選從王文成游伯病瘵遇
異人起之遂學長生不樂婚宦伯嘗將命謁淮陽守
田用周守以上客客之授之館大河萬戶劉清聞守
有重客雋而不婚請女之伯固辭必告父母歸侍母
疾留五年鄉先正唐文襄治漕爲劉申好父命伯逆
女女先亾伯慙自傷矢不婚如疇昔仲有室三舉子
乃子仲之子後之既而三子遞殤憂在宗祀縣令徐
思行急元素召伯與之言松喬孝乎抑亦有虞氏孝
耳對曰選顛毛艾矣顧安得婚令召黨正里胥畢舉
名家女以待卜母吳出新豐里甲申春二月辛酉始

生既及笄嫻嫻教吳翁習元素高義伯且才遂內翁
歸于伯姑念婦年不及子之半寧詎能安目逆之阼
階端靖婉婉退而省之梱內則奉伯如冀缺如梁鴻
有頃伯居父喪既毀而中寒疾母宵衣侍藥五挾日
始平歷百日不渝伯乃無恙明年病復作侍亦如之
姑曰幸哉安良人矣姑觸毒暑大患瘍蔓而周身潰
則臭腐狼藉女僕揜鼻皆去母獨傾身爲仲姒先奉
臥起率袒衣膚受之母令布縷相及更迭扶掖跬步
不離閱三月乃瘳姑勞二婦而獨多母夫夫且安介
婦何論姑姑及九齡庭內爲壽姑嘻嘻語母天何庇

一老嫗爲而得天天將壽而姑章而孝母首舉子堯
治姑咕咕幸有孫居無何隣狗癡而嚙伯妄庸醫以
毒攻毒毒益深得善醫解之必詳禁忌乃可保母涓
一室器用畢新奉伯安居澡祓而躬自御舉次子堯
壽乳之室中三歲服勤卒用勿藥堯壽幼慧九年而
殤母懼傷姑心爲之飲泣伯喪母而故疾作幾不勝
喪醫者目爲挾食傷寒亟屏飲食伯既骨立神亦浸
銷母以病得之哀而勞胡爲乎枵腹坐稿乃私進蜜
一匙既又進醪一勺神什一來復遂謝醫藥而躬自
調伯起而語人吾得婦更生矣先是母從容風伯兩

世三喪在焉姑春秋高君復善病及今不舉當室之
謂何伯避席而拜善言遂率仲營葬事諸通家會葬
者無類數十百人母自中厨辨應之無所失伯季年
水大至篋書窖粟河伯席卷無遺喜客如初至則命
具即不給百畫務當伯心伯考終母捫心如刺刃一
號一慟聲徹九天孤始成童喪不必易惟其稱率從
薄葬祔祖塋旁既祥將遣孤就學食貧滋甚無以贄
先師第授書師心自討中夜則孤肱篋母辟纊形影
相依攻苦愈厲孤既冠遣之周游四方孤以母在不
遠遊未遑受命母否否而王父而父率以游道廣見

聞孺子不爲北海鯢殆將爲篋中蠹耳孤唯唯遂游
吳入楚師事蘄州顧長公比三年垂橐歸省鄉人目
攝其汗漫嫻笑之母曰不然吾第令孺子求益于身
心非資斧以也既內吳氏婦適得女雛間一舉子而
殤母望望然如弗及歲戊子水三四溢襄市積害田
功米價倍者三以澤量殍孤傾故橐婦脫故裝悉入
子錢家不足以糊其口麥不秋而價益踊間得之挈
餅婦壹以其精者進姑次及夫子猶則糝麩有半婦
與子女僕妾均焉母覘之呵止婦天災不啻千里都
人士且瞠瞠吾老而子婦良幸不爲殍足矣即而能

婦吾何敢異食以對夏天且汝身即吾身汝子女則汝身也僕妾衡夫人之子彼釵則吾何安婦更進之卻勿享八月望命婦布樽簋就仲妣家則以仲妣先歸年且長吾下仲妣若在鴈行相友四十年迄今無間仲妣喪視亦越十年即子舍進羞必就之同七箸往歲宵中不舉則仲妣方伏匡牀今即饑仲幸彊飯命吾子堯治若仲妣子舜耕行酒佐二母歡及露下沾衣堯治請歸寢母夢援筆作一壽字穎脫未成覺而疑既而長太息吾倍夫子二十有五年矣徒以孤故忍百死守之乃今相從九原吾始願也俄而眎有

疣出自鼻醫不知其名相視技窮延百日竟不起母
故揭大士像虔事之終身顧命婦禮帥如初神在與
在比大漸默無遺言其月仲冬其日甲戌行年六十
有五乃大歸既帷堂帷內外無戚疏少長皆號哭卑
則倚門哭遠則望門哭相聞則巷哭莫不盡哀母所
居嘉樹四匝或巢鳩或巢鵲可俯而闕呼而羣下于
庭曹雞鶩粒母遷正寢羣鳥遶室哀號晝夜迴翔臨
七日而後去傷哉貧也其何以得人羣通物類哉聖
善徵矣母謂孤不宜子第改葬而翁孤習堪輿得兆
珠曹塢將徙父喪奉新喪合葬歲杪雨雪浹旬孤顙

天將事者不知所出及期雪止載道疑冰如天衢拑
土而封雪蔽天而集條而啟條而闔若有司存既葬
而舉孫登辰母瞑矣余故多孤有母母有子遂爲之
志爲之銘銘曰亭亭乎九臯胡然而求其曹翩翩乎
九苞胡然而闕其毛伯也天弧母也天弢伯也任放
母也任勞嗚呼六尺之孤彊而窘步彌月之孫襁而
待哺樹背有護萎茲溘露其芳未沫揚于中路陸海
玄珠瘞此黃壚斯其老萊氏之徒敬以告墓大夫